

郭襄靖公遺集

郭襄靖公遺集卷之十二

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

諸議 嶺南分守叅政

鄉約保甲議

爲申嚴保甲以弭盜安民事照得安民之政無他

去其所以害民而已廣之爲民害者莫甚於盜賊
邇年以來縱橫肆出民無寧宇或遭捉擄之患或
罹劫奪之苦或坐板誣之累遂令稍有貲產者不
敢村居素稱良善者至難自保舟中皆爲讐敵郭
外卽爲畏途民生之不安甚矣今思所以弭盜安
民竊謂舍保甲之外無良法也蓋一人爲盜必有
同黨鄰族非不知之也打劫捉人必有賊躋鄰族
非不知之也劫後分贓必有窩主鄰族非不知之
也但知之而不敢言恐言之而禍及已耳假令保

甲之法果嚴使下之人知上之必於行法畏法之心甚於畏賊則鄉鄰宗族豈肯縱容兇黨橫行海陸之中而不虞罪之連及哉夫保甲之法善矣乃有未必獲盜反以擾民或方行而忽罷者此其故坐在令煩而民不相信益以聚兵之說奉行之人又從以操練徵調恐嚇之是徒爲地方添一騙局矣如之何能推之皆準行之無弊也耶故欲行保甲之法惟在擇其至易至簡者令民易知而易從焉可也爲今之議必將各縣所管地方總繪一圖

凡道里之險易鄉堡之連絡纖悉具載得其圖矣
該縣掌印官務要留心親理責令各圖里長通將
各鄉如一百家以上者擇一人爲約長二人爲約
副其所謂約副二百家以上者擇二人爲約長約
副不問鄉官舉貢生員凡有恒產而行義爲一鄉
信服者皆可推舉縣官以禮而敦請之約長約副
旣得其人即令將本鄉居民每十家編爲一甲其
零戶不成甲者入於末甲之後一甲又推有身家
者一人爲甲長自置橫牌一面界定格眼將十家

挨次順寫門戶籍貫人丁生理如陽明王公行于
贛州牌式付之里長送縣該縣照其編定者用十
眼書篇逐甲謄出類次成冊嚴出禁約將牌令十
家輪流懸掛各該約長約副甲長務須嚴加約束
互相覺察各甲內如有積年慣惡強盜及開窖藏
人坐地分贓真實窩主各約長約副責令甲長執
獲送官其係賊犯仇扳同徒寄贓照捕照提有名
者及平時竊取鷄豚禾稻之徒俱准赴約長約副
甲長處首明取具戶族并同甲保認甘結領回改

行從善以開自新之路約副甲長卽將保認結狀
繳送本縣通申守巡道本府并捕盜廳各原行衙
門立案准與住提此後各甲之內敢有一人仍前
爲非甲長知會約長約副查其的確即便執送呈
治如有阿縱不舉及事發而捏詞保結者九家俱
連坐以知情之罪其有專務賭博遊蕩之徒一併
呈究仍諭令上中人戶量派出銀置備鑼鼓銃藥
甲長率令各甲丁夫自備鎗牌器具時加防範一
遇本鄉有警俱要齊出救護其上戶及有職役之

人許以義男代替如獲有功一體解官照格給賞
其各鄉出入總路俱要建設閘門其餘旁蹊曲徑
盡令堵塞以便保障仍每月朔望約長約副甲長
會於公所勸諭鄉民務各孝順父母尊敬兄長教
訓子孫和睦鄉里患難相恤守望相助善相勸勉
相告戒務爲良善之民共成仁厚之俗間有貧難
下戶無田可種無藝可營者勸令上中戶收爲
傭僱無令流移其尤老弱疾病無依者結送有司
收之養濟院無令失所若有戶婚田土不平及鬪

爭小故卽與處分毋令纏自後官司拘拿賊犯人
命重情不必差人下鄉只許里長齎牌至約長約
副處查係某甲長管下卽喚令同甲拿獲約長約
副甲長共出結狀付里長併同甲一二名解送此
非惟可以杜差人搔擾之害而中間情真罪當及
扳指誣賴之事皆可一訊而決矣至於會城內外
則宜論舖編排一如鄉堡之法仍通將原行禁約
刊刻印發十家總給一張懸掛壁間俾其知所遵
守其約長約副除舉監生員自有常禮外雖係鄉

民有司務加敬待至縣之時許服深衣階前參揖
如有事故及一時推舉未當者該縣掌印官時加
稽察另行舉替務在得人以服衆心其甲長日後
有不公不法及生事科擾者即許約長約副呈舉
更替此法一行則村村有備人人知法小人有所
畏而不爲良民有所恃而無恐內盜無自而容外
侮無自而入誠有如陽明王公所云其法甚約其
治甚廣不但盜賊可息詞訟可簡因是而脩之補
其偏而救其弊則賦役可均因是而脩之警其薄

而勸其厚則風俗可淳因是而脩之導以義而訓以學則禮樂可興安民正俗之道孰善於此本道忝有父母斯民之責每切痼瘼乃身之憂講求咨訪已逾數月詢之廣州府番禺三水等縣正官及就質齒德鄉士夫皆謂此法之易於行而勢之必不容緩者也及查屯軍蓬士賢鄉民岑萬山等各呈告如出一詞則知軍民之心皆所稱便似無不可行者矣合無候呈詳允日通行所屬府縣掌印官遵照着實舉行刻期完報其巡司營堡等官

不許一毫干預總甲打手人役不許一名差遣府
縣捕盜等衙門不許調用查點如有故違及各縣
正官有奉行不力虛文塞責與假手佐貳首領等
官致有生事擾民者俱聽守巡道從重叅究庶法
令嚴明上下遵守地方有安堵之日矣奉提督兩
廣都御史吳 批所議深切弭盜安民之計但保
甲之法節經言官建議本部院諄諄督行而未聞
有一效者則以有司每視上司文移猶如故紙一
繳遵行照驗即便束之高閣吾輩思籌甚熟告戒

甚詳而民之不臻厥成如故也可勝慨哉仰道備行各縣掌印官如法悉心視爲第一重大前件孜孜講求務慎圖研窮於其始而責成申飭於其終談道仍將奉行有成及闕茸虛應各官分別勤惰呈來獎戒重者旌薦之提問之以考其成焉繳

巡按廣東監察御史陳 批據呈委係簡易正大

之法率而行之豈但可以弭盜息爭雖淳古之治奚難復哉至於長副之得人奉行之不擾則守令事也守令責也如議着實舉行用觀厥成繳

撫守並用議

爲議行撫守並用以安地方事據英德縣懷義等
都里排劉昺等并清遠縣滘江吉河等鄉里排徐
文傳等各呈稱節被大小羅山徭賊出劫生靈受
害乞早剿滅以救民命等情到道議行間隨奉巡
撫都御史李 案驗行道差人齎牌前去宣諭大
小羅山頭目與黃文昌陳朝勝等再不許糾衆出
劫自取誅戮等因奉此當差僧官何繼容排年茹
池黃子龍等兼同本道差人齎牌入山多方撫諭

去後本年正月初三初五等日據上下二山新民
吳子和張子賢曾玄七龐朝用等各正身及黃龍
黃文昌等各弟男赴道投見該本道再三諭以

朝廷恩威軍門號令吳子和等俯首感泣告稱罪當
萬死永不爲非但黃龍一夥原係蒲嶺逃命即今
失業難以存活乞賜押回原籍居住耕種庶可安
生不致相累及稱歲饑人衆乞爲通濟鹽米等情
并據英德清遠各縣繳到各山猺獍新民供結俱
稱自後傾心向化各情由前來爲照羅山諸賊縱

橫肆劫生民罹害其罪誠不容誅但山峒聯絡綿
亘二三千里北通臨藍西連懷賀等處其不能草
薙而禽獮之蓋自古然也況當二源大征之後財
力窮殫之時征討之事未敢輕議今吳子和等旣
已畏威聽命似應俯順區處以安反側之心以養
和平之福隨查往時商民人等興販米穀魚鹽類
在黎峒水流寨水等處接濟諸徭黎峒則濱臨大
江流寨則深入賊地以故有搶船渡江之患多投
山誘賊之徒行據該縣議申上山應於麥源水口

下山應於洗口對面舊名老舖場各設立墟場暫
通貿易仍將新民李子貴廖南庄龐朝用李月高
立爲徭長排年黃子隆劉宗文民人駱廷濟鄉老
曾廷安立爲墟長令之各相約束每山仍給與圓
牌十面懸掛出墟不許執持器械以防爭奪之患
詢之民徭俱已稱便已經督行其黃龍一夥查大
征哨冊不係征剿之數因聞風驚疑逃投徭寨情
尚可原除行韶州府掌印官會同捕盜通判梁節
查議或准令押回蒲嶺照舊安插或將原籍田產

追價給還聽於上下山買田耕種或將附近民田
抵換務要從長計議以杜禍根外又該本道看得
反復不常者徭民之性撫守並用者兵家之權今
羈縻之方固不可少而防禦之畧尤不可以不嚴
所謂防禦其要有二在大江各涌口當設水哨之
兵在連河各要害當設屯守之兵查得自英德洸
口而下至清遠池水江口一帶河道如洸口大小
樟黎峒水白花水米貴水殺雞坑牛皮塘金斗角
稔坑口各涌俱係寨賊潛駕小艇奪舟渡河之所

方其在艇不過三五人耳使我兵防而撲之爲力甚易待其奪舟登岸則勢衆難防故蚊蚋大廟二營舊雖有哨兵之設賊每渡河輒自顧不暇其孰敢禦之茲議於各涌口每處撥隨捕哨官六十名或四十名用哨船二隻以爲坐守小艇二隻以爲巡緝各給軍令小牌一面往來傳報有警則協力追捕無事則焚燒草木搜除小艇自洗口起至稔坑口止委哨官祖萬竹統之池水江口委清遠衛哨江指揮鄭永齡統之各照信地嚴行守把則大

江所限賊無飛渡之理不惟清英二縣河東地方
可以無憂即三水南海從化等縣地方皆無徭寇
之患矣自十一月初三日本道方行設立至今一
帶江道頗靖孤舟夜泊不聞他虞誠恐日久法弛
竊謂大江水哨之兵終不可罷者也又自浣口而
上西通連陽一帶河道爲遠三四百里灘多水淺
處處可渡發賊不時越劫英德曲江乳源樂昌陽
山等縣地方莫可防遏欲議各灘撥兵守把則兵
分勢薄遇警反不能支欲議各圍起集鄉兵協守

則既妨農業而民園又有孤弱之慮茲議於各要害灘頭如歪口螺黃田灘行委守備吳良知統領浙兵三百三十名百戶秦邦爵領兵三百八十名老鴉高堂板神灘三灘委把總陳璘領兵七百名三江村碓子灘委哨官成治領兵三百五十名各立一營防守每灘仍設小艇二三隻以爲巡緝傳報之用仍令沿河圍寨各立煙墩一所貯積柴草賊出則舉火并擊鼓鳴鑼聲銃相應蓋此間村民多有燒山煙火攘突鼓鑼若止以一二件爲號未

免疑悞故遇警必須火銃鑼鼓四項齊發以爲的信各營官兵務要協同鄉兵奮勇截殺或尾其後或遏其歸如有退縮遲悞治以軍法如此則營壘旣固烽燧旣謹堅壁清野處處皆兵賊自寒心而不復越出爲患矣自十一月初三日本道方行議設時兵猶未齊而煙墩猶未立也白沙報警官兵追截於清溪雖獲功不多賊之死傷者以百數被創而去殘冬不復再出未必非有兵之故也誠恐日久法弛竊謂連河屯守之兵終不可罷者也及

照前項水陸二兵所以爲英德曲江等縣計已詳
矣其爲清遠計猶有未盡也蓋清遠縣治逼近大
小羅山雖設清遠一衛官軍但上下二班輪戍蒼
梧及窰局二匠與跟用差遣之外僅存老弱不及
百數兼同該縣民壯以備城守而已此外惟有李
貢等四百餘名分爲上下二營割東西城外萬一
有警僅足以衛關廂而鄉村則不暇顧矣查得先
年池水鄉設有禾雲龍鎮青石岐塘板潭石川等
六營興仁鄉設有高田一營太平善化鄉設有秦

王楓坑石坎沙牛逕四營共兵二千名後因徭情頗順暫以掣散近日稔坑徭人陳朝勝等巢勢甚猖獗不時出沒劫掠而清遠村落原不築圍以致被害尤甚原設兵備道專一劄住該縣今既分爲二道移劄廣韶二府遂令清遠重地空虛深爲遠憂議者謂今二源蕩平南韶二府地方寧戢而山徭之患正在清英連陽之間兵備道宜定八月至二月止駐劄英德三月起至本月水漲之時駐劄韶州方可以便調度仍添設嶺南叅將一員專劄

清遠上而南韶下而廣州各地方皆其責任遇有
山獍等賊出沒悉聽設法驅剿其高田一營切近
稔坑縱一時未能遽復當於滘田逕口立營屯兵
四百名委官統領以遏其出劫之衝池水鄉總復
禾雲一營屯兵三百名委官統領護民耕種庶幾
盜賊稍戢居民爲稍安也本道雖帶管道務未久
然分守茲土已幾三年往來咨訪非一日矣經理
之猷慙無寸益而痼瘼之念實切此心敢摠一得
之愚以備採擇倘蒙俯賜施行地方幸甚職等幸

甚緣係議行撫守並用以安地方事理本道未敢
擅專擬合呈請爲此今將緣由具呈照詳施行奉
總督兩廣都御史吳 批據議精切仰候會議具
題施行繳巡撫都御史李 批據議區畫周詳撫守
並用深於地方保障有裨仰俱如議着實舉行英
韶分月住劄甚便調度添設叅將俟會行另示繳
巡按御史王 批據呈撫守諸議委曲詳盡該道
爲生民立命周矣至於分月駐劄英德韶州尤爲
得策俱准照行其添設叅將一節仍候會

題繳

監督龍門從化二哨會剿劇寇兩收大捷申文
爲官兵會剿劇寇兩收大捷一掃殘兇事准總統
總兵俞大猷并統督龍門從化哨叅將王詔英德
哨叅將亦孔昭河源哨遊擊魏宗瀚翁源哨遊擊
戴冲霄各手本并據統領從化哨原任叅將梁高
協守備楊弘舉南贛坐營王如澄陸續各報稱親
督官兵於三月十四日夾剿鴨峒諸賊四月十四
日攻勦溪頭諸賊各擒斬功次數目緣由到道案

查先奉撫按案驗爲逆叛稱王封官虜殺人財急救地方事題奉

欽依動調官兵備行各哨督領征剿各巢强賊除陸續獲功解報外隨有從化哨垵坪賊首黎永元因見大兵進勦率黨從嚴峒衝出藍糞山溪頭舊巢據險拒守該本道看得從化哨田州日兵勢寡一時難支探各賊有求招之意訪有龍門縣儒學生員葉沾霖係與黎永元姑舅兄弟見被生員譚文易告訐自願報効撫賊當令前進撫諭黎永元委

果真心乞招令書總謝用行等赴道投見認寫甘
結准令回還擒拿別巢首賊贖罪隨有翁源英德
龍門河源各哨賊首鄧廷鳳朱廷福官祖政李明
梁忠余青山盧元清等賊各帶徒黨妻子奔劄十
八山玉溪等處欲投合黎永元以拒官兵勢甚猖
獗又經本道差舍人劉泮同葉沾霖再三諭令黎
永元不容合夥給與旗榜以堅其志鄧廷鳳等賊
方卽移遁鴨崗屯聚緣係各哨遁賊本道具稟南
贛軍門兩廣察院請發河源英德翁源等哨官兵

前來夾勦一面掣調龍門哨鎮安泗城二州目兵
行原任叅將梁高分布京灘嚴防固守使賊不能
內擾他遁就奉軍門督令守備楊弘舉統領思明
州目兵前來協守又行管理糧賞南雄府同知張
尚潮州府同知白世徵署龍門縣印肇慶府通判
張大亨協理哨務廣州府通判吳堽番禺縣知縣
滕伯輪從化縣知縣余鎧增城縣知縣王師性經
歷郭守道縣丞陳朝用等輸運糧餉多製火藥并
行廣州府知府陳復升添募精兵置造長鎗以備

應敵仍一面馳報俞總兵提兵速赴計剿隨奉兩
廣軍門鈞牌似道嚴督官兵晝夜加謹把截毋容
奔遁候俞總兵提兵至彼務將各賊乘機勦蕩以
策殊勲并奉南贛軍門批節行翁源等哨催督頗
嚴今當爲再催該道仍運籌決勝以樹偉績及蒙
巡按廣東監察御史陳 憲牌行道督各官兵攻
破巢園查審有名賊首果否在巢務須嚴追計獲
以絕禍根以快衆怒又奉兩廣軍門鈞牌內開衝
鋒破陣之兵仍懸賞銀一十兩功成給賞并蒙

院牌行將士有能衝鋒破敵擒斬奏內有名賊首
官祖政李亞元朱廷福鄧廷鳳黎永元每名本院
另賞銀一百兩報至即賞等因俱經通行遵照及
節行催促隨該監督河源哨副使張子弘和平哨
副使王化翁源哨副使劉穩英德哨僉事李偕各
督發官兵馳至夾剿三月初九日俞總兵親督龍
門哨叅將王詔英德哨叅將亦孔昭河源哨遊擊
魏宗翰翁源哨遊擊戴冲霄劉都司各所統漢土
官兵齊至龍門之南坑地方該本道親詣與俞總

兵會議督發進剿鴨岡諸賊及會差名色把總陳朝哨官王贊舍人劉泮等復進黎永元巢再三撫諭彼益無疑情愿立功自贖又議贛州坐營王如澄并上杭漳州新會等兵立爲四哨衝鋒每哨懸賞銀八百兩責其專一衝鋒破陣窮賊所往而追擊之至十二日早賊聞大兵會合卽向石峒奔遁隨該原任叅將梁高守備楊弘舉一面督率田州思明等兵馳至石峒口堵截一面飛報俞總兵請命進止賊知石峒有備不敢越出十三日五更又

穿山橫竄韶峒梁高楊弘舉復督各兵前至韶峒
口堵截是日俞總兵督發名色把總朱相等兵先
行俱聽梁高楊弘舉調度次發南贛坐營王如澄
率領贛兵繼至俞總兵親督中軍把總指揮陳其
可標兵并龍門哨都指揮楊燁等河源哨指揮張
榮等英德哨指揮徐天麟等各領所部之兵隨至
至十四日巳時王如澄陳其可等各領十餘騎登
高瞭望親見大勢劇賊劄在增城界首東峒山下
即時飛報俞總兵嚴催各衝鋒兵直迫賊所列障

薄之又催各州狼兵疾赴策應因見東峒山左舊
有蹊徑恐賊設伏以繞我兵先期令遊擊戴冲霄
督南韶守備吳良知指揮陳璘率各部兵專割彼
處堵截又令名色把總諸葛堯賓督兵由東魚貫
而進以爲右翼奇兵令叅將王詔亦孔昭遊擊魏
宗瀚督各哨官兵由西魚貫而進以爲左翼奇兵
至申時漢土官兵畢集賊馳數騎接戰我兵肅隊
以待賊復少却俞總兵申嚴退怯之令隨令中軍
把總指揮陳其可原任叅將梁高守備楊弘舉

營王如澄等分督各把總衝鋒兵前驅仍誠約中
軍放炮一聲諸將士點鼓齊進賊即悉衆分作兩
翼據險逆戰各把總鼓噪疾趨賊退一步憑高死
拒我兵進登一步攻之益力輒退輒進被我兵斬
其前拒者百餘賊計窮蹙遂散亂奔竄狼兵乘勝
登山奮力追殺共斬獲四百餘級時日已暮休兵
屯薄十五日黎明盡發諸兵四山追擊又陸續擒
斬六百餘功其墮落坑塹及自縊服毒饑餓死者
不計其數緣山林深廣殘黨乘夜奔命勢不能無

十八日辰時據報翁源英德各巢賊數百西遁烏石地方該本道與俞總兵議發衝鋒各兵并龍英泗城思明田州各狼兵以原任叅將梁高守備楊弘舉中軍把總陳其可等統領追截及將翁源英德二哨官兵發叅將亦孔昭遊擊戴冲霄領回徑行追剿另報時黎永元一巢見鴨崗諸賊破滅勢孤魄奪目遣徒黨赴告願聽處分本道與俞總兵復行責限立功及同知張尚通判張大亨多方計諭至三月十八日據梁高楊弘舉報稱有河源哨

桵木山賊首余青山并英德哨塔子寨賊首周玉水即周玉瑞各黨遁匿藍糞後山有陳朝與葉沾霖督本哨賊首黎永元追捕生擒余青山周玉水即周玉瑞張朝能周漢四名并斬獲賊首級共一百二十五名顆解報本道訪聞鄧廷鳳逃依黎永元巢內復諭葉沾霖前去責令綁解鄧廷鳳及將各被擄人口送出方淮安插伊巢我兵隨卽移營三層逕黎永元方自驚懼二十六日密約鄧廷鳳管下千長梁鎮溪陳宗權等將鄧廷鳳網綁解道

就日轉解軍門訖本道與俞總兵四月初一日又移兵進劄京灘而分叅將王詔所部兵前往梅洲一帶屯劄以遏其奔遁之路黎永元益懼又奉軍門差督招贄畫官蔡清奇蔡政良徐應南李尚德等節次撫諭就日黎永元纔將被虜男婦陳璫等四十一名口馬一匹送出本道又訪黎永元勢逼求招陰懷異志收留鄧廷鳳殘黨以爲自衛之計若不殄滅終爲地方之害復經具由稟報節奉兩院牌諭催督本道隨與俞總兵決計進兵十一日

督發衝鋒標兵把總翁思誨等并遊擊魏宗瀚所部河源各哨兵由牛背脊而進叅將王詔所部龍門哨兵由鐵岡而進原任叅將梁高守備楊弘舉所部從化哨兵由鴨崗而進分布既定乃會出告示明諭徒黨鄉解黎永元送官黎永元見四面有兵難以遠遁乃誓衆協心堅爲拒敵之計俞總兵即親督把總翁思誨督上杭兵爲前鋒許以照前懸賞銀八百兩次黃處林喬樾王宗義兵又次朱相余正兵又次黎勝林太兵又次原留英德哨指

揮吳靖中兵翁源哨指揮伍惟統兵又次魏遊擊
帶下雷思恩向武遷隆兵十四日黎明催督前兵
至根竹園魚貫而進黎永元是日五更自督賊六
百由小路來十里之遠伏於大山背欲包我兵之
後又一枝三百人由大路來接戰於我兵之前哨
探之兵報與翁思誨遂率上杭兵就大山背先殺
伏賊四起接戰內一賊高聲喝令各賊衝戰翁思
誨知係首賊揮令各兵合力專攻有上杭兵葛鼎
榮爲首劉萬勝爲從先斬黎永元首級一顆奪獲

相銀獸頭刀一把當陣斬獲四十餘功各賊遂將
陳朝葉沾霖殺死退卻入巢鐵岡鴨峒各官兵乘
勝同進攻克溪頭巢寨各賊丟棄妻子四散大山
奔遁各哨官兵跟踪追剿斬獲共計八百零七功
其餘殘黨遁匿深山饑餓瘦死者無數其黎永元
首級責令原差舍人劉泮及衆鄉導人等識認真
的俱經轉解訖備查東峒之捷河源哨報獲功二
百七十八名顆南賴哨報獲一百二十名顆內賊
首朱廷福首級一顆龍門哨擒斬二百一十一名

穎内生擒賊首鄧廷鳳一名從化哨擒斬三百七十六名穎内生擒賊首余青山周玉水即周玉瑞二名英德哨報獲七十七穎內有賊首賴梅盛首級一顆翁源哨報獲四十一名穎通共一千零三功溪頭之捷俞總兵衝鋒兵并河源哨兵連斬首黎永元共獲二百零三名穎龍門哨擒斬三百九十名穎內斬獲賊首關松欽首級一顆從化哨擒斬一百七十八名穎翁源哨指揮伍維統斬獲一十七穎遷隆峒土官黃一元斬獲六穎英德哨指

揮吳靖中斬獲一十二顆通共八百零七名顆其
俘獲人口器械不計通行各哨自解外爲照賊首
鄧廷鳳黎永元等稔惡多年橫行數郡刼戮圍寨
罹害者多被脅從占奪田疇失業者盡因徙死盖
神人之所共憤

天討之所必誅者也及至深入避兵或據溪頭以藍
糞爲足恃之險或屯鴨峒以羅山爲必遁之區衆
號一萬多徒山聯五百餘里互爲聲勢益肆兇殘
仰仗

天威震臨神心助順軍門籌畧指示號令申嚴用致
大將宣猷偏裨共念多方以携其黨計出萬全先
聲而奪其心氣增百倍交鋒東峒一鼓而群醜就
殲迎敵竹園三合而元兇授首即擒獲之功級幾
及二千計俘獲之婦男何啻倍蓰萬民共快四境
底寧是誠各哨之偉功地方之深幸也所據前項
效勞官員相應論敘有功官兵相應查照各哨報
冊陞賞陣亡名色把總陳朝生員葉沾霖功實可
嘉死尤足憫相應查例恤錄以爲死事之勸其統

領從化哨原任叅將梁高及小嶺小哨指揮馬賢
始而嚴峒被衝兵威稍挫不無踈悞之咎繼而京
灘死守劇賊不遁因成夾勦之功相應量其功過
輕重而曲示優敘者也爲此今將緣由備呈伏乞
照詳施行

又報龍門從化二哨大捷申文

爲逆叛稱王封官虜殺人財急救地方事嘉靖四
十五年五月初七日奉提督兩廣都御史吳 鈞
牌前事備仰本道速查本哨征進一應漢達土官

兵自進山舉事至今攻破巢寨獲過功次止開總數如係有名賊首則開具姓名要見攻克事由與服罪乞降等項備將其官有功有勞應從錄薦及被害地方府縣衛所掌印捕盜等官失事功罪應議應贖緣由火速具由詳報以憑查覈併敘施行奉此行准統督叅將王詔手本查報龍門從化二哨各該官兵擒斬獲過功次等項數目緣由到道查得先奉兩院案驗前事動調官兵備行各哨督領征勦各巢強賊本哨分爲龍門從化二哨本年

二月初七日龍門哨統督叅將王詔督都指揮楊
燁領東蘭州目兵由板嶺進指揮孫江領鎮安府
目兵由熱水進指揮楊勲領泗城州目兵由高明
崗進分剿鴻鴈洲牛欄峒沙塘下橫岡大賊首鄧
廷鳳等巢各賊探知兵至糾集衆黨退據大山拒
敵各哨官兵乘勢進攻有指揮孫江督兵追至夾
水口與賊交鋒當陣斬獲賊首陳子璋朱用積二
顆賊總譚貴一顆從賊級七十顆陣亡目兵達舍
總甲共七名被傷目兵肆名奪獲器仗八件續又

督兵追至黃峒斬獲從賊級十四顆通共八十七顆俘獲賊屬二十六名奪回被擄二十一名口各哨官兵列營角陂沙塘下盡將各巢放火焚燬鄧廷鳳等驚懼奔入黃峒山小巢有都指揮楊燁督兵追進攻破小巢當陣并陸續生擒從賊一名斬獲賊首鄧廷高江見山二顆并從賊級一百四十六顆俘獲賊屬男婦三十五名口奪獲牛十一頭器仗三件陣亡目兵七名被傷目兵八名賊氣益喪思爲遁計至十一夜盡率各巢賊衆至沙塘下

潛衝泗城州兵營談哨官兵奮力抵敵藥箭鳥銃傷賊無數次日五更賊復率衆來衝官兵仍前奮敵追勦生擒從賊一名陸續斬獲從賊級七十四顆俘獲賊屬十二名口中軍哨指揮楊綸督獲賊級一顆又把截英公沙坑等隘千戶孫應學張果百戶陳世儒督兵生擒賊首朱世元一名從賊五名斬獲賊首譚孔周一顆從賊級二顆并續已勘明被虜黃惟錫阮馮保等二十一名俘獲賊屬十名口奪回被擄男婦九名口被傷鄉夫一名從化

哨統領原任叅將梁高督指揮王漢領田州兵由
翁逕進指揮馬賢分領田州兵由小嶺進分勦圻
坪李屋村楓樹潭大賊首黎永元等巢各賊探知
先期棄巢出據大嶺背梁高同王漢哨兵已抵各
巢放火焚燬斬獲從級九顆俘獲賊屬一口奪回
被虜男婦二口奪獲牛五頭馬一匹器械五件各
賊突從嚴峒衝出有馬賢哨兵遇賊被衝各兵奮
敵獲從賊級七顆陣亡旗軍目兵二十九名被傷
目兵四十名各賊奔至從化縣藍糞山溪頭舊巢

屯劄梁高督回各哨官兵十四日進巢攻剿各賊
接戰王漢官兵當陣斬獲從賊級十顆中軍哨指
揮趙陞哨兵生擒從賊一名守把嚴峒三合水千
戶童斌鎮撫張捷并兼理哨務委官同知白世徵
各督兵夫生擒賊首陳仕祥一名從賊七名斬獲
首從賊級三顆俘獲賊屬二十六名口奪回被擄
十二名口馬一匹隨有龍門哨賊首鄧廷鳳英德
哨賊首朱廷福盧元清翁源哨賊首官祖政李明
梁中河源哨賊首余青山等各見藍糞山十八山

深廣險阻從古避兵之地各携徒党妻子奔入十八山潜通黎永元欲合夥以拒官兵勢甚猖獗本道遣人密探黎永元有求招意訪有龍門縣報效生員葉沾霖係與黎永元姑舅兄弟就令齎牌前進溪頭撫諭准其立功贖罪黎永元令書總謝用行等面縛赴道投見認寫甘結情愿擒拿別巢首賊自贖本道添差舍人劉泮復行諭令不容官鄧諸賊合夥仍給旗榜以堅其志官祖政鄧廷鳳等賊聞知方行移道鴨峒屯聚緣係各哨遁賊勢當

合剿本道隨即具稟兩院請發河源英德翁源等
哨官兵前來夾攻一面掣調鎮安泗城二枝目兵
行原任叅將梁高分布京灘嚴防固守使賊不得
內擾他遁就奉軍門督令守備楊弘舉統領思明
州目兵前來協守本道督行龍門從化二哨分理
糧賞兼理哨務等官南雄府同知張尚潮州府同
知白世徵廣州府通判吳璽肇慶府通判張大亨
番禺縣知縣滕伯輪南海縣知縣詹仰庇從化縣
知縣余鎧增城縣知縣王師性廣州後衛經歷郭

守道香山縣縣丞陳朝用等設法輸運糧餉多製
火藥并行廣州府知府陳復升添募精兵置造長
鎗以備應敵仍一面馳報總統總兵官俞大猷提
兵速赴計勦隨奉兩廣軍門牌仰本道嚴督官兵
晝夜加謹把截毋容奔遁候俞大猷總兵提兵至
彼務將各賊乘機勦蕩以策殊勲并奉南贛軍門
批節行翁源等哨催督頗嚴今當爲再催談道仍
運籌決策以樹偉績及蒙巡按御史陳 牌行將
士有能衝鋒破敵擒斬奏有名賊首官祖政李亞

元朱廷福鄧廷鳳黎永元每名本院另賞銀一百
兩等因俱經通行遵照及節行催促隨該南贛河
源和平翁源英德各哨監督官各督發官兵馳至
夾勦三月初九日俞總兵親督叅將王詔亦孔昭
遊擊戴冲霄魏宗瀚都司劉世恩各所統漢土官
兵齊至龍門之南坑地方本道親指計議督發進
剿鳴峒諸賊及會差名色把總陳朝哨官王贊舍
人劉泮等復進黎永元巢再三撫諭彼益無疑又
議將贛州坐營王如澄并上杭漳州新會等兵立

爲四哨衝鋒至十二日早賊聞大兵會合即向石
峒奔遁梁高楊弘舉督兵堵截賊知有備不敢越
出十三日五更又穿山橫竄韶峒梁高楊弘舉復
督兵堵截益謹至十四日巳時王如澄等瞭望諸
賊劄在增城界首東峒山下飛報俞總兵督兵直
逼賊所隨令梁高楊弘舉王如澄把總陳其可等
分督各衝鋒兵前驅王詔等督各州狼兵分左右
兩翼竒兵魚貫並進賊即悉衆據險逆戰官兵鼓
噪疾趨賊衆稍却憑高死拒我兵進攻益力斬其

前拒者百餘賊計窮蹙散亂奔竄狼兵乘機勝登山奮力追殺共斬獲四百餘級時已日暮休兵屯薄十五日黎明盡發諸兵四山追擊又陸續擒斬六百餘功其墮坑塹及自縊服毒饑餓死者不可勝計時黎永元一巢見鴨峒諸賊破滅日遣徒黨赴道告聽處分本道復行責限立功至三月十八日據梁高楊弘舉報稱河源哨賊首余青山英德哨賊首周玉瑞各黨遁匿藍糞後山有葉沾霖督黎永元追捕生擒余青山周玉瑞賊總張朝能周

漢共四名并斬獲首級一百二十一顆奪獲被擄
五口賊屬一口已將功次轉解訖本道隨訪鄧廷
鳳逃依黎永元巢內復諭葉沾霖前去責令綁解
鄧廷鳳及將各被虜人口送出方淮安插伊巢本
道同俞總兵隨即移營三層逕黎永元方自危懼
二十六日密約鄧廷鳳管下千長梁鎮溪陳宗權
等將鄧廷鳳綑綁解道就日轉解軍門訖本道與
俞總兵四月初一日又移兵進劄京灘而分叅將
王詔所部兵往梅洲一帶屯劄以遏奔遁東南之

路黎永元益懼又奉軍門差督招贊畫官徐應南
李尚德蔡清奇蔡政良等節次宣諭就日黎永元
纔將被擄男婦陳孺等四十一名口送出給各親
屬認領本道又訪得黎永元收留各哨殘黨以爲
自衛之計若不殄滅終貽地方後患復經具由稟
報節奉兩院牌行催督本道隨與俞總兵決計進
勦十一日督發衝鋒標兵把總翁思誨等并遊擊
魏宗瀚所部河源各哨兵由牛背脊而進叅將王
詔所部龍門哨兵由鐵岡而進梁高楊弘舉所部

從化哨兵由鴨峒而進分布既定乃會出告示明諭徒黨綁縛黎永元見四面有兵難以遠遁乃誓衆協心堅爲拒敵之計十四日黎明俞總兵親督諸兵前進至根竹園離巢十里黎永元自督賊衆前來接鎗內喝令衝鋒把總翁思誨知係首賊揮令各兵合力專攻有衝鋒上杭兵葛鼎榮爲首劉萬勝爲從先斬黎永元首級一顆奪獲廂銀獸頭刀一把當陣斬獲四十餘功各賊遂將陳朝葉沾霖殺死退卻入巢鐵岡鴨峒各官兵乘勝齊進攻

克溪頭巢寨各賊丟棄妻子四散大山奔遁各哨官兵跟踪追勦斬獲共計八百零七名顆其餘殘黨遁匿深山饑死無數其黎永元首級責原差舍人劉泮及衆鄉導人等識認真的俱經轉解訖查得東峒之戰除南贛河源翁源英德各哨徑自另報龍門哨都指揮楊燁哨斬獲從賊級四十五顆俘獲賊屬二十二名奪獲器仗五十八件陣亡目兵五名被傷八名指揮孫江哨斬獲從賊級四十六顆俘獲賊屬十八名口奪器仗十一件指揮楊

勲哨斬獲從賊級二十五顆中軍指揮楊綸哨斬
獲從賊級七顆委官同知張尚指揮陸萬程并紀
截指揮王憲千戶孫應學百戶陳世儒經歷郭守
道典史陶先舉等官督各兵夫生擒賊總丘瑞張
益二名并從賊八十九名斬獲從賊級六顆俘獲
賊屬十二名奪回被虜三十八名共計賊級二百
二十一名顆內生擒大賊首鄧廷鳳一名從化哨
原任叅將梁高部下家丁兵夫生擒從賊一名斬
獲從賊級七顆守備楊弘舉部下家丁兵夫生擒

從賊一名斬獲從賊級二十五顆俘獲賊屬四口
又共督獲首從強賊余青山等一百二十五名顆
指揮王漢哨斬獲從賊八十六顆指揮馬賢哨斬
獲從賊級四十七顆中軍指揮趙陞哨生擒從賊
一名斬獲從級二顆俘獲賊屬七名口委官同知
白世徵通判吳璽并把截千戶童斌王良談道明
彭兆鎮撫張捷典史陸循極吏日游潮巡檢唐時
勉各督兵壯鄉夫生擒賊總吳奇李白陳文科吳
天相四名從賊三十九名斬從級三十八顆俘獲

賊屬二十六名口奪回被虜三十六名口被傷軍人鄉夫三名共計賊人賊級三百七十六名顆內生擒賊首余青山周玉瑞二名賊總張朝能周漢二名溪頭之戰除河源各哨另報龍門哨都指揮楊燁哨斬獲賊首關松欽一顆從賊級一百一十四顆俘獲賊屬十名奪獲器仗三件陣亡目兵二名被傷目兵九名指揮孫江哨斬獲從賊級九十四顆俘獲賊屬二口奪獲器仗七件指揮楊勲哨生擒賊一名斬獲賊級十顆叅將王詔部下家丁

斬獲從賊級五顆中軍指揮楊綸哨斬獲從賊級
五顆把截指揮王憲千戶孫應學百戶胡大通陳
世儒巡檢季文明各督兵夫生擒從賊九十八名
斬獲從賊級六十三顆俘獲賊屬九名奪回被虜
二十九名口奪獲器仗二十六件陣亡鄉夫二名
被傷鄉夫六名共計擒斬三百九十一名顆從化
哨原任叅將梁高家丁生擒從賊二名斬獲從賊
級九顆守備楊弘舉部兵生擒從賊一名斬獲從
賊級十一顆指揮王漢哨斬獲從賊級二十五顆

奪回被虜一口指揮馬賢哨斬獲從賊級十二顆
中軍指揮趙陞哨斬獲從賊級一顆委官同知白
世徵通判吳璽弁把截千戶童斌鎮撫張捷吏目
游朝典史陸循極巡檢唐時勉劉宣生擒賊首張
子逢一名賊總譚宗勤王信美余子才黃亞貴四
名從賊一百零三名斬獲從賊級九顆俘獲賊屬
十名口器仗四件奪回被虜三十二名口被傷鄉
夫二名共計擒斬賊人賊級一百七十八名顆隨
奉軍門鈞牌并准總司關蒙巡按御史王 憲牌

備行本道督各官兵搜除殘黨俱經督行龍門從
化二哨官兵嚴加追捕龍門哨并把截陸續生擒
從賊十名斬獲從賊級三十二顆從化哨并把截
陸續生擒賊從二十名斬獲從級十二顆又楊弘
舉督田州兵進剿藍灘諸賊斬獲一十二功內賊
首黃允夫一顆本月十一日又據龍門哨委官千
戶張果報稱奉委生擒七屯大賊首姚應兆東村
首惡周汝仲沈村首惡沈時威寺貝屯首惡阮宗
興共四名并撫插過男婦二千八百零八名口總

計龍門哨叅將王詔督獲生擒大賊首鄧廷鳳一
名并本叅家丁兵壯斬獲從賊級六顆領哨廣州
右衛支俸都指揮楊燁哨生擒從賊一名斬獲賊
首鄧廷高江見山關松欽三顆從賊級三百二十
顆右衛指揮使孫江哨斬獲賊首陳子璋朱用積
二顆賊總譚貴一顆從賊二百二十七顆右衛指
揮僉事楊勲哨生擒從賊二名斬獲從賊級一百
一十七顆中軍廣州後衛指揮僉事楊綸哨斬獲
從賊級十三顆各把截廣州前衛指揮同知王憲

兵生擒賊總兵瑞張益從賊六十名斬獲從賊級
三十八顆增城所副千戶孫應學兵生擒賊首朱
世元一名從賊十一名斬獲從賊級五顆本所副
千戶張果兵生擒賊首姚應兆一名賊總周汝仲
沈時威阮宗興三名從賊十四名前衛中所副千
戶彭兆兵生擒從賊三名斬獲從賊級三顆增城
所百戶胡大通兵生擒從賊十六名斬獲從賊級
七顆本所試百戶陳世儒兵生擒從賊二十三名
斬獲賊首譚孔周一顆從賊級四顆管理龍門哨

糧賞兼理哨務委官南雄府同知張尚督各兵夫
生擒從賊三十三名斬級六顆廣州左衛指揮同
知陸萬程兵生擒從賊十名斬獲從賊級四顆廣
州右衛指揮使王權兵生擒從賊二名廣州後衛
經歷郭守道兵生擒從賊二名斬獲從賊級三顆
龍門縣典史陶先舉兵生擒從賊五名斬獲從賊
級三顆東莞縣中堂巡檢司巡檢張文焰兵生擒
從賊十四名斬級三顆上龍門巡檢司巡檢季文
明生擒從賊七名新會縣河泊姜楫生擒從賊一

名計龍門一哨通共生擒首從賊犯二百三十二
名斬獲首從賊級七百四十六顆總共九百七十
八名顆從化哨原任叅將梁高守備楊弘舉督獲
生擒賊首余青山周玉瑞二名賊總張朝能周漢
二名斬獲從賊級一百二十一顆又梁高部下家
兵生擒從賊三名斬獲從賊級十六顆楊弘舉部
下家兵生擒從賊二名斬獲賊首黃允夫從賊級
四十七名顆領哨廣州前衛指揮僉事王漢哨生
擒從賊四名斬獲從賊級一百三十六顆廣州右

衛達官指揮馬賢哨生擒從賊六名斬獲從賊級
六十六顆中軍廣州左衛指揮使趙陞哨生擒從
賊二名斬獲從賊級三顆各把截官從化哨副千
戶童斌兵生擒賊總吳奇一名從賊二十二名斬
獲從賊級十九顆左衛鎮撫張捷兵生擒賊總李
曰陳文科吳天相三名從賊二十二名斬獲從賊
級十顆右衛前所副千戶王良兵生擒從賊一十
七名斬獲從賊級五顆後衛後所副千戶談道明
兵斬獲從賊級二顆前衛中所副千戶彭兆兵斬

獲從賊級二顆從化所吏目游潮兵生擒從賊二
十一名增城縣典史陸循極兵生擒從賊三名流
溪巡檢司巡檢唐時勉兵生擒賊首張子逢一名
賊總余子才一名從賊一名管理從化哨糧賞兼
理哨務委官潮州府同知白世徵督各兵夫生擒
賊首陳士祥一名賊總譚宗勤一名從賊五十八
名斬獲從賊級十二顆兼理哨務委官廣州府通
判吳聖兵生擒賊總王信美一名賊從七名斬獲
從賊級六顆從化縣典史錢松兵生擒從賊三名

新會縣牛肚灣巡檢司巡檢劉宣生擒從賊一名
斬獲從賊級二顆香山巡檢司巡檢潘叔儀兵生
擒賊總黃亞貴一名新會縣大瓦巡檢司巡檢傅
鎰兵生擒從賊一名東亭驛驛丞謝尚韜兵生擒
從賊一名計從化一哨通共生擒首從賊犯二百
一十四名斬獲首從賊級四百二十一顆總共六
百三十九名顆二哨總共一千六百一十七名顆
俘獲賊屬二百三十二名口奪回被虜二百一十
四名口奪獲牛十六頭馬五匹器仗一百二十五

件陣亡目兵達舍鄉夫五十二名被傷八十一名
并查龍門哨督招官蔡清奇蔡政良招出被虜溫
士成梁洪養等六十九名口從化哨督招官徐應
南李尚德招出被虜葉亞璫等四十二名口俱經
審勘給發及將功級通行解報賊屬牛馬發龍門
從化二縣變賣銀兩入官器仗收庫被虜人口給
親收領并將本哨東蘭泗城田州官兵遵奉明文
於本年五月二十日掣回送赴軍門發放摘留鎮
安府并思明州官兵防守搜勦殘賊獲功另報外

爲照賊首鄧廷鳳黎永元等稔惡多年流毒數郡
茲幸駢首就戮巢穴蕩平萬姓之積憤頓紓千里
之秦蕪盡闢實由

天奪彼魄神啓吾衷軍門指授非常責成特至將佐
因之協心士卒無不效力是用累收全捷一掃妖
氛誠地方莫大之幸也所據一時與事功罪官員
相應分別敘論以彰激勸除叅將王詔持廉邁俗
負勇兼人躬董全師懋隆丕績緣係統督官員不
敢槩敘外查守備楊弘舉機宜夙練勵疲卒以保

危營才識兼優運奇猷以破勁敵東峒之功獨著
藍灘之捷尤奇所當首敘者也原任叅將梁高嬰
方張之劇寇少挫兵威保如綫之孤營大伸士氣
督戰旣云苦心俘馘已多成績功浮於罪所宜併
敘准贖原罪者也哨隊官都指揮楊燁指揮孫江
楊勲王漢把總鄧子龍千百戶王楨祝惟幾王元
清黎軾彭仲沾趙夢李劉良蕭雲漢督招贊畫李
尚德徐應南蔡清奇蔡政良把截官指揮王憲千
百戶張果胡大通或摧鋒破陣收蕩平之全功或

協計宣威釋無辜之多命所宜併敘者也又查得
廣州府知府陳復升禦侮心勤募精兵以資戰守
奉公念篤時輸發以濟軍兵處置多方蕩平攸賴
南雄府同知張尚潮州府同知白世徵督餉隨營
六師咸由以宿飽分兵扼險諸酋多出其獻俘旣
嚴出納之司益懋贊襄之略廣州府通判吳堊肇
慶府通判張大亨固守孤城士民之所倚重綜理
百務上下之所仰成啓處不遑憂勤特至內張尚
張大亨兼效撫處之勞共成勘定之勲以上各官

所宜收錄者也番禺縣知縣滕伯輪南海縣知縣
詹仰庇從化縣知縣余鎧增城縣知縣王師性廣
州後衛經歷郭守道香山縣縣丞陳朝用或艤舟
輸餉而應濟有餘或露宿供軍而奔馳獨苦內滕
伯輪當徵兵之伊始尤隨事而著功所宜併議敘
獎以示酬勸者也其餘供事吏目巡檢驛丞等官
量行措賞不敢瑣瀆及查得前項強賊節年劫掠
龍門從化等縣地方各該掌印巡捕等官皆有失
事之責但盜起二源禍延各邑府衛遠在會省勢

難預防而二縣先任知縣林宗和陳豫章等久經
去任似難追論惟龍門縣知縣歐陽良從化縣知
縣余鎧巡捕龍門等縣地方廣州後衛指揮楊綸
從化所掌印千戶童斌巡捕百戶周矩龍門縣巡
捕典史陶先舉從化縣巡捕典史錢松旣不能先
事隄防又不能臨敵捍禦均屬有罪內歐陽良近
經乞休楊綸近經病故余鎧蒞任未久供餉有勞
俱應免究童斌守把嚴峒致賊衝入續有截獲之
功僅償踈悞之咎陶先舉錢松各督鄉兵亦收微

績與百戶周矩共四員但應量行究治者也領小
嶺哨達官指揮馬賢遇敵不支傷兵有故雖巨寇
之鋒勢所難禦而專哨之寄罪不容辭但斬獲多
功辛勞足念亦應量行究治者也除將獲功首從
員役備查實授署試職銜及願陞願賞等項明白
造冊另行繳報外今將查過龍門從化哨官兵獲
過功次的數并應敘應論功罪等項緣由呈乞照
詳施行

二源等地方善後議

爲議處兵後地方以圖治安事嘉靖四十五年四月初八日奉軍門鈞牌仰道會同各哨監統官將地方善後事宜逐一從長計議停當開列欵條先行具由詳報以憑叅酌等因奉此除行會各哨監統官查議外隨委南雄府同知張尚肇慶府同知郭文通親詣踏勘酌議去後今據各官開呈勘議緣由到道談本道議照得廣惠韶三府諸賊盤據山谷占奪田疇屠戮之惡旣稔於多年征討之功幸收於一旦當黎巢掃穴之時正更化圖新之始

若不創制於久遠難以弭患於將來所擬一應善
後事宜本道再三訪求備加參酌雖未能懸合機
宜亦不敢苟且稱塞理合開列條款先行呈覽伏
乞鈞臺採擇施行

計開

一設立縣治以便撫馭照得中原之地郡邑基
布故政教易周盜賊不作今擬查鴻鴈洲東
抵河源縣二百里東北抵和平縣二百里西
抵英德縣三百里西南抵從化縣三百里龍

門縣一百五十里南抵博羅縣二百里北抵
翁源縣二百五十里地廣山深政令不及盜
賊據險嘯聚必然之勢也若縣治不立撫馭
無人則亂民終於梗化遺孽久而潛滋歲苦
侵掠民其何有寧日耶先年大征之後議割
河源縣上下五里糧米二千三百餘石翁源
縣黃雪二峒及礮頭共糧米六百餘石英德
縣象岡德岡二都糧米一千三百餘石創立
貴從縣築有城圍遺址尚存後因英翁之民

苦於分隸遂爾中輟今據同知張尚勘稱舊基雖爲各縣適中之地但四山高峻城池低汚旣非風氣所宜而臨河泛溢不免傾摧之患當於舊基之東約三里許改築於象嶺之原包嶺之一半在內一半在外陟巔一望四面舉在目中且河流環繞諸山拱抱中有饒田不下千百餘頃誠一壯邑也而同知郭文通則以舊基爲便本道備查二官所勘之地相距非遠祇在一嶺上下間耳候另取精通

地理覆勘以憑建立自鴻鴈洲起至河源以達惠州一水之便則新縣之立當屬之惠州府明矣其原議割地之說訪之翁源士民猶如徃昔多不樂從一以版籍之既定一以府治之太遠似難強其所不堪據同知郭文通議稱象岡德岡之民願附新縣已行該府縣查議未據回報以本道查之四州成都府屬有威州編戶四里羗民僅六百餘名有保縣編戶一里羗民僅一百八十餘名歲所輸入

稞蕎數百餘斛官師之俸廩多編外邑以給之而捍禦吐蕃實爲全蜀屏蔽又廣東之連山恩平和平廣西之永康從善皆以編戶三四里足成縣治以制伏民徭今河源之上下五里田糧二千三百餘石亦不爲少卽令自爲一縣設知縣典史各一員教官一員俸薪皂卒儘足以供無藉於割地以益之其或不足則稍倣威保之例量移附近縣分編僉解給立一縣以安十餘縣之民卽以十餘縣之

民力而協供一縣不爲過也其城垣之築最爲目前急務竊以各縣地方連年多故誠民窮財盡之時也若以取足諸民不惟力不能堪其事終致停寢應照計估定數俱請發公帑以充所需若工匠人夫船隻等項不得不派取各縣以本道愚計應照會省外城事體將河源歸善博羅東莞增城龍門從化清遠翁源英德曲江等縣分定城基丈尺各責令佐貳或首領官一員隨帶大匠若干名管理

築砌俱聽善後委官督率而統於該守巡道以稽察督責之凡工匠人夫之工食俱動支官銀公平催用一毫不以病民如此則事體省紛更之擾而縣治有速成之期矣

一委留官兵以嚴防守照得二源諸賊近奉大兵征討顯被俘馘者萬有餘徒若焚溺服毒窮餓而死者枕籍山谷不可勝計但忠信長吉兩頭坵一帶尚多撫巢未剿容有隱伏之奸而各哨散遁殘徒藏匿菁莽茹草食木以

苟延旦夕者亦不能無若不委控制屯兵成
守誠恐死灰復燃漸致炎燎縣不得立民不
敢居非所以善其後矣今已奉軍門定委叅
將王詔及留向武下雷兵二枝屯守無容別
議其俞總兵議立三小營一劉長吉嶺東道
撥兵一千委官一員守之一劉黃崗南韶道
撥兵一千委官一員守之一劉板嶺廣州道
撥兵五百委官一員守之無非協守要害以
杜殘黨復集之患所當依行各道作速撥守

又蒙察院案行議革南韶守備添設叅將一員查得惠潮瓊廉高肇各有叅將分守獨嶺南一道先係高肇叅將兼管近議南韶二府責之守備而廣州府所屬地方責之都司總捕官在守備則事權不重在都司則責任不專每遇地方有警不足恃賴往往候請軍門調發將領督兵應援及兵至而賊已遁遂致縱橫無忌民生不安厥有由也及又查得從化縣礦山出產礦砂先年封閉地方無警自

嘉靖三十五年以來有異省奸商賄求縣官准令開取馴致江西湖廣等處流徒集衆四五千入終歲屯聚竊開取利遇冬月則以取礦爲事春夏水發或去或留肆行劫掠從化之民極受其害中間投入二源之黨甚多如余青山等是也近因動舉大兵方漸解散擬待秋冬之交復回開挖若不及今防遏竊恐異時之患不在山寇而在礦徒也誠使新縣之基旣成諸營之兵旣掣就將守備裁革

而嶺南三府總設叅將一員於乍坪或小長江地方立營駐劄止據各府適中之地廣韶二道共抽選兵壯二千名付之訓練常川屯守一可以彈壓內地可以保固新縣而礦徒隱禍尤可以杜於未萌矣其乍坪一路上通英德翁源下通從化清遠諸處各賊會哨出劫多集於此先年設有巡檢司今其地猶稱曰舊巡檢也如設立叅將則巡司可以無設若叅將屯劄象嶺則乍坪應創立巡司以防

截之庶幾縣司聯絡血脉貫通居常可以杜
糾集之謀有警可以扼出入之吭地方可保
無虞矣

一招集流移以便復業照得二源之民被諸賊
占據田地迯移外縣依住旣多年矣今幸大
兵剿平巢穴更生之望復業之思何啻饑渴
之於飲食也若不及時還定而安集之則晚
苗不播秋收難期復失一年之望見今各姓
良民間有自來尋復舊業但前項田土向係

墾闢且多膏腴今各賊就戮有田無主者甚
多如鄧廷鳳名下有田四五頃其地可推也
訪聞河源豪強之家有指以債負有指以糧
差有指以典賣詭詐多端預爲并吞之地一
時真僞難以輕信合行同知郭文通豫出大
字告示張掛曉諭令其各具復業狀詞明開
各家田地先年坐落某處共若干常年供納
稅糧共若干原係某都里長某人甲下有何
券約可憑卽與准理吊查該縣節年黃冊如

委有證據仍親自丈量界至明白給與印信
執照付令管業蠲其二年租稅以示優恤之
意二年之後照舊徵納稅糧應辦新縣差役
不許朦朧影射其餘無主田地盡數清查明
造冊籍如有人承買公平定價變賣以充城
垣廨宇之費如無承買通將有人無田之家
及原非本圖人民願來耕種者俱量給與田
千畝或五畝免其一年租稅次年納糧之外
仍每田一段稅租五斗輸之新縣以充官師

俸廩之需仍將河源哨支剩糧米五百石多至一千石運發委官同知郭文通收貯如復業之民有窮乏不能自存者量給一石濟贍以免失所如此則窮民遂生業之願而豪强者不得以售其爭奪之奸矣

一開釋自新以廣德意照得除暴所以安民天討所加固不敢徒事姑息以貽地方之患但自雲溪鎮鴻鴈洲以至圩坪黃崗小長江等巢穴皆已蕩平近日諸兵搜扒所獲一二逃命者

類皆飢餒僵仆氣息奄奄原其當時或被脅從或被擄掠情狀容有可矜若盡驅之死於心有所不忍卽如從化之十八山溪頭英德之象岡等處皆昔日之撫民也今之安分治生供官服役與編氓無異顧所處置何如有以制其死命耳除本哨地方本道已出給告示候兵退張掛招諭外合行各哨并同知郭文通等仰體鈞臺好生之心廣開自新之路但有自來投降係圖冊有名及兇強積惡者

摘解軍門處治其餘脅從徒黨查係龍從英
翁等縣者給米存養發回原籍責令里排保
領安插改行從善其係河源者俱充新縣爲
民撥與各復業良民共爲依住或聽傭僱每
名量撥無主田三畝或二畝給與耕種以資
口食一年之後照納糧差仍稅租五斗貯縣
以濟公費其招回殘黨如有窮餓不能自食
者亦量給米五斗賑贍免致餓死有孤撫恤
之心如此則藏垢納污之下賣劒買牛賣刀

買犢之風將復見於今日矣

一編立保甲以便稽察照得山野居民各立土
圍以防盜賊勢頗翕聚非如他處之渙漫無
紀若不因其已成之勢立爲保甲之法以維
繫之則積習旣久民緣爲奸固有恃險而抗
拒官府亡匿而躲避差徭者矣合於一圍之
中擇其忠信足以服衆者一人立爲保長其
次擇有誠實者十人立一甲長設或中有仍
前作孽者甲長以其事聞於保長保甲以其

事聞於官府寘之於法遇有地方盜賊生發
保長則督率甲長圍夫以截撲之如患在五
里之內凡附近隣園互相策應不得坐視觀
望以致盜賊蔓延有不如約者治以官府之
法凡有追徵錢糧及勾攝人犯等事止於園
長名下取足則非惟可杜奸民負固之患亦
可免差人下鄉之擾矣

一開闢道路以通往來照得各巢多盜蓋因山
川險阻嘯聚之易而追捕之難也今查龍門

一路如地名趙崗板嶺從化一路如地名圻坪翁源一路如地名冬瓜嶺皆係層崖疊壁叢樹茂林誠有一夫伏路百夫不敢入者合行督令留守各兵壯於前項險隘之處林木蓊翳者悉剪伐之道路狹小悉開闢之務令人馬可至糧餉可通仍行令新邑縣官常年葺治如北地燒荒之法庶道路坦平往來者無所阻而潛伏者無所容又二源等地方善後議

爲議處兵後地方以圖治安事奉軍門鈞牌前事
行仰各道將地方善後事宜逐一從長計議停當
詳報以憑叅酌等因依奉行據南雄府同知張尚
肇慶府同知郭文通惠州府同知唐德瑞開呈勘
議緣由到道該各道議照得廣惠韶三府諸賊盤
據山谷占奪田疇屠戮之惡旣稔於多年征討之
功幸收於一旦當犁巢掃穴之時正更化圖新之
始若不創制於久遠難以弭患於將來所擬一應
善後事宜會同勘議明白開列條款合先呈奪爲

此今將緣由備呈伏乞照詳施行

計開

一議立縣會看得河源縣地名鴻鴈洲卽象嶺之下其地東抵河源縣二百里東北抵和平縣二百里西抵英德縣三百里西南抵從化縣三百里龍門縣一百六十里南抵博羅縣二百里北抵翁源縣二百五十里地廣山深政令不及盜賊嘯聚勢所必至今議於此立縣控制誠爲得策且河流環遶諸山拱抱中

多腴田正各縣適中之地先年曾經僉事陶
魯建議立縣遺址尚存但城基臨河近多水
啗規模狹隘不足以聚民庶應於舊基展拓
一百五十丈橈近象嶺以接地脉庶風氣攸
萃水陸交通誠爲經久之計又勘得圯坪地
方係四通要路各賊出劫多集於此先年設
有巡檢司今廢相應復設以扼要害

一議劄地會看得原議欲割河源之長吉都上
下五里田糧二千四百餘石爲縣而以韶州

府英德縣之象岡德岡等都糧米一千三百
餘石翁源縣之黃峒雪峒甜菜西坐并礪頭
礪下等處糧米六百餘石益之今查得河源
上下五里無容別議及礪頭礪下水趨翁源
勢難強割其翁源之黃峒雪岡并甜菜西坐
等處水出河源原有分水一凹可爲界限共
有田糧五百餘石英德之象岡德岡嚴政等
都內地名茶坑沙田遙田臘溪小溪皮村蒲
菖塘等共田糧八百九十餘石皆距新縣爲

近俱應割附但據英德象岡各都之民則告
屬韶州河源下五里之民則告屬惠州以致
查勘各官議論不一談各道覆看新縣地方
計道里之遠近則惠韶二府大略相當而惠
州一水之便其勢爲順况河源下五里如小
席魯古兩頭坵上下舉林等處多係撫巢在
惠有撫處之素猶可望其輸心向化若遠屬
於韶恐終爲頑梗之徒揆之事體則屬之惠
州府尤爲久安長治之策又河源縣大洲都

二圖排年蕭昇等及和平縣惠化都下五里
排年周萬龍等俱願告屬新縣該分巡惠州
道批行同知唐德瑞推官鄧繼科勘議取有
各民願屬惠州結狀繳報似出民心樂從但
和平縣田糧本少若割惠化都下五里以隸
新縣恐和平益致褊小人民益致困累且自
惠化都以達和平中有地名男子徑路通岑
岡盜賊不時出沒擄掠賴惠化都人民頗強
足以捍禦一隸新縣則和平之勢愈孤所以

爲一都之計則可非所以爲一縣計也如英
德新割里民必不以屬惠爲便只將大洲都
二圖田糧二百石并翁源縣黃雪等崗田糧
五百石湊河源上下五里民屯糧二千四百
石通共三千一百石儘足立爲一縣而象岡
等都照舊屬之英德不必割隸庶民情帖服
事體歸一尤可以免紛更之擾矣

一議設官會看得新縣之立百務伊始民志方
新所賴以經理安輯惟縣令得人爲急而耐

勞苦甘淡薄者尤難其人即除授科目之士
未必節習於風土宜於民情恐或不勝其任
查得先年江西新立龍南安遠等縣多以府
同知等官官理縣務誠重其選也今查肇慶
府同知郭文通才力頗優志向亦銳辛勤澹
薄皆其所堪先署河源印事甚爲民心所屬
况以衛幕之職而蒙超擢之恩則傾心竭力
以報知遇尤其分之所當盡者若使改授惠
州府同知專理縣事其一應創立城池清查

田土撫處殘民等事悉以屬之其施爲將有
可觀者矣再照新縣民稀事簡既有知縣一
員宜照簡僻事例止設典史一員儒學教諭
一員仵作巡檢司巡檢一員陰陽醫學僧道
會官各一員六房東西司吏各一名典吏各
一名儒學仵作巡檢司司吏各一名縣堂皂
隸十四名門子二名典史皂隸四名直監禁
子二名預備倉斗級一名縣當庫子一名分
司府館山川社稷邑屬等壇門子共二名鋪

卷之三
三
舍四所每舖司兵各一名縣前渡夫一名守
城民壯一百名炸坪巡檢司弓兵二十名以
上各役每年給工食銀七兩二錢僱募又知
縣典史合得柴薪皂隸共五役每役編銀一
十二兩馬夫二十役每役編銀四兩儒學齋
夫二役每役編銀十二兩膳夫二役每役編
銀十兩通共銀一千三百兩梔同知郭文通
議將新縣錢糧通融均派計每年每石不過
五錢有餘不必逐年審編以滋繁擾似爲可

行

一議戍守先該俞總兵議設叅將一員於象嶺
就以遊擊戴冲霄

題陞職銜將見在親兵一千名又加以指揮陳璘伍
惟統兵七百名立一大營於象嶺仍以南韶
道兵一千名委官一員劄營於黃崗以惠州
道兵一千名委官一員劄營於長吉屯以廣
州道兵五百名委官一員劄營於板嶺并蒙
察院明文議革南韶守備添設叅將一員駐

剗新縣控制一方誠爲久安之策但初議之時各巢徒黨尚未盡滅誠慮兵散之後復集爲患若非設將屯兵恐無以善其後今幸巢穴蕩平其一二殘徒俱經撫捕寧妥若使縣令得人撫馭有法自無意外之慮且錢糧有限轉輸甚難合無免設叅將行令同知郭文通悉心區處凡可爲保障重計不容少有怠忽其原議立營黃岡長吉屯板嶺仍行各道速照委官分布防守候新縣已成人民盡復

方議掣散

一議工費先據委官同知郭文通等勘估城基
濶四百丈高一丈九尺每丈用銀一十九兩
四錢叁分一釐五毫城門二座每座用銀三
百五十一兩一錢一分城樓二座每座用銀
六十八兩九錢零五釐五毫縣學公廨私衙
并分司府館倉庫囚獄舖舍等項用銀二千
四百一十七兩七錢五分七釐五毫通共用
銀一萬一千零三十四兩三錢八分八釐五

毫數目手冊到道該各道會看冊內所開各
項工料數目恐有未的復行廣州府督同番
南二縣掌印官再加備細估議實用工料價
銀八千一百六十二兩六錢零八釐五毫計
減下銀二千八百七十一兩七錢八分緣照
工程浩大恐一時計估未能周備臨用及有
不敷合量以一萬兩爲率以備支用但查所
屬各府州縣連歲兵荒相繼民疲財匱欲行
分派建脩勢必不能合無請行布政司查將

堪動銀兩陸續解發脩築有剩貯庫其合用
木匠一百名石匠一百名泥水匠一百名窑
匠一百名鐵匠二十名鋸鐸匠四十名土工
築墻夫二百名搬運土石包砌城垣并各衙
門人夫三百名通共夫匠九百六十名合於
河源歸善增城翁源英德龍門從化等縣均
募應用每縣責令佐貳或首領官一員隨帶
前去管理照依會省外城事體分定城基丈
尺築砌俱聽善後委官督率又用小河船一

百隻查得廣州府屬各縣俱係深水船隻亦合於歸善河源龍川博羅四縣通融募用仍乞行專委一道統理其事以稽察催督之庶事有專責而縣治可以易成矣

一議田糧會看得各巢田地不等有係各賊原業者有被占據無主者有雖無主而有親兄弟者有雖有主而曾典賣與賊者合行河源英德翁源三縣掌印官設法清查但係賊田與無主者俱沒官變賣以充兵食如無承買

招人佃種或量給新民耕作歲收其租仍免
一年糧差以資開墾之費若有主與有親兄
弟者准令具告明開坐落某處原載稅糧若
干係某都里長某人甲下吊查黃冊相同方
與丈量界至給與印信執照付令管業暫免
糧差二年以示優卹但訪得豪強之家詭詐
多端預吞騙之地及上下五里大洲都與黃
雪等峒田糧之多寡數目亦恐多有隱蔽之
奸合行惠州南韶二道嚴督各縣官查覈處

分無容奸徒冒占影射庶小民既不失業而
公賦亦有定供矣